

WWF, TANOTI NGEMANSANGKA PRODUK BANSA PENAN

August 5, 2016, Friday

Borneo Post

Gempung tu deka ngelakuka sereta ngangkat asil pengelandik jari enggau dagang wi ba Kubaan-Puak



SAMA SETUJU: Dr Dionysus (dua kiba) betukar sempekat ke udah disain enggau Fong, seraya Hon (kiba) enggau Ngo ngemata.

KUCHING: Tabung Alam Sedunia-Malaysia (WWF-Malaysia) udah nyain sebengkah Memorandum (MOA) enggau kompeni Tanoti Sdn Bhd, dikena ngelaku sereta ngemansangka produk ukai kayu ari kampung ba kandang menua Kubaan-Puak di Ulu Tutoh, bagi Menua Miri.

Skop kerejasama pengelama dua taun nya nyengkaum bejalaika kus enggau latih, ngelakuka produk ukai kayu ari kampung, ngatur program meri penyedar sereta besilih penerang ti pulaika pemaik ngagai kededua piak.

Nitihku Direktor Eksekutif WWF-Malaysia enggau Ketuai Pemesai Eksekutif, Dato Dr Dionysus Sharma, organissaayen nya deka begempung enggau komuniti Penan dalam unit

pengatur kampung Kubaan- Puak ba pengawa ngemansangka asil pengelandik jari, ngenegapka kaul dagang sereta ngemansangka dagang ari asil pengelandik jari wi.

“Tu deka mantu nambahka penatai pemisi ngagai bala komuniti menua tu ke ulih dikemeranka dalam timpuh ke panjai. WWF-Malaysia bisi sukung teknikal ke tegap ba pengawa meri lalau ba pengawa sereta nyaga kampung, tang kurang pengelandik ngelakuka asil pengelandik jari ari produk ukai kayu ari kampung sereta ngemansangka dagang.”

“Tu mih pengelandik ti dikembuan sida Tanoti. Tanoti deka mantu ari sukut kapasiti begunan, ngemansangka bala komuniti menua tu ngasilka produk ari asil pengelandik jari, ngelala sereta ngelakuka produk.

“Tu mega deka nyaga kualiti produk, nyengkaum matau pengelandik enggau penyikar dalam pengawa ngasilka produk,” ku iya rambau pengawa nyain sempekat ke diatur ba Tanoti House, Jalai Tabuan bedau lama.

Dr Dionysus madahka pengawa nyaga ukai semina deka ngemataka spesis ke bebida, tang mega pasal orang, rampa menua enggau gaya pengidup alai sida ulih terus ngemeranka main asal sida dataika belama iya baka ti dikearap.

“Ari barang ti dikenai besari- sari, sida ulih ngasilka iya nyadi seiti produk tauka barang seni ti deka matak orang nyimpan, reti iya produk tu bisi nilai tauka bisi rega. Tu deka muka awak ungkup bala komuniti ngembuan pengidup ke menyana agi,” ku iya nambah.

Ba lansa ke bukai, Direktor Tanoti, Jacqueline Fong nerangka nengah kerejasama ti, dikearap tikas pengidup bala komuniti ke diau di kampung deka ulih diangkat tinggi agi.

“Tanoti ngemeratka pekara ba pemanah asil pengelandik jari dikenai ngangkatka tikas pengidup enggau gaya pengidup. Kelimpah ari pengawa dagang kain songket tenun kami ke besai, kami ngemansangka inisiatif komuniti kami dalam asil pengelandik jari ari wi laban kami nemu pemesai guna nyaga kampung ngambika ngembuan pengelantang ba rampa menua sereta nentuka raban komuniti kampung terus bisi kaul ngagai pemansut asil ti beguna.

“Dalam projek tu kelebih agi Tanoti merambu deka ngangkatka produk ukai kayu ari kampung lalu nukar ngagai asil pengelandik jari ke ngembuan rega ti tinggi lalu pengudah nya nyadika penatai pemisi ngagai bala tukang.

“Batang tuju kami deka nambahka pemanah dalam reka bentuk, nyaga kualiti sereta ngelakuka produk asil pengelandik jari raban komuniti Kubaan-Puak lalu nyadika iya penatai pemisi ngagai bala tukang sereta ruang bilik sida,” ku iya.

Iya ngarapka MOA dua taun ulih ditampung ngagai timpuh ke lama agi pulaika pemaik timpuh pan-jai ngagai bala komuniti ke dikaul.

Sama bisi ngulu pengawa nyain MOA nya Ketuai Program WWF-Malaysia Sarawak, Dr Jason Hon sereta Professor serakup Fakulti Seni Kreatif enggau Gunaan Universiti Malaysia Sarawak (Unimas), Dr June Ngo, ke mega deka nulung dalam nambahka pengelandik raban komuniti ngambika nilai produk ulih ditinggika ari asil pengelandik jari sida.

WWF-Malaysia kandang ke diatu benung bejalaika pengawa ngemansangka projek ngatur kampung enggau tegut dalam pelin rampa kampung tropika alai pengelantang rampa menua, pemujur ba pekara ekonomi enggau pekara rama ti engkeman dalam unit ngatur kampung Kubaan-Puak, mungkur 17 bengkah komuniti Penan enggau sebengkah komuniti Kelabit.

Pemesai kandang Projek Koridor Kubaan-Puak iya nya 360,000 hektar, mungkur mayuh bengkah unit ngatur kampung entara Taman Negara Mulu enggau Taman Negara Pulong Tau.

Tu sebagi ari ‘Heart of Borneo Trilateral Corridor.